

重修
植物名實圖考

小野職齋重修
隰草類

重修植物名實圖考卷之十四

清國 吳其濬原撰

日本

伊藤圭介 校閱

小野職愨 重修

岡松甕谷 句讀

隰草類

苧麻

第一圖不詳第二圖カラムシ
附種苧麻法王禪麻苧圖譜苧略

甘蕉 バセツ 芭蕉

牡蒿 オトコヨモギ

鼠尾草

苘麻 イチビ 苘實

鱧腸 ダカサアヲウ 即旱蓮艸

水蓼 ミシダ

苦苣

馬鞭草 クマツヅラ

蘆 ヨシ 附陸疏廣要兼葭

龍常草

蒲公草 タンポポ

三白草 カマシロクサ

劉寄奴 又一種

龍葵 イヌホトツキ

莪蒿

搥胡根 ヤブラン

鬼鍼草 ヒンダシクサ 鬼釵草

地楊梅

茜

紅花 ベニバナ 又紅藍花

穀精草 ホシタケ

木賊 トクサ

萱草 ワスレグサ

鷄冠 ケイトウ

火炭母草 又烏炭子

狗舌草

鼠麴草 ハコクサ

鴨跖草 ツエグサ

毛蓼 ケタデ

璽菜 キセハダ

蔞草 無圖

燈心草 トウシンサウ 二圖

狼把草

黃蜀葵 トロニアフヒ

海金沙 カニクサ

胡盧巴

小青 カマヤマカウシ

地蜈蚣草

秦州無心草

水英

九牛草 無心草

陰地厥

竹頭草

迎春花 ワツバイ

翦春羅 ガンビ

淡竹葉 サ、クサ

鹿蹄草

紫花地丁

胡堇草

攀倒甌

麗春草

見腫消

曲節草

水甘草

莠竹 コブナザ、コブナクサノ一種

千年艾 ウラジロキク

箸 クマザ、

半邊蓮 アゼムシロ

水楊梅

菩薩草

石道遙草

苦芥子

田母草

地芙蓉

田麻

翦刀草

布里草

黃花了

苧 麻



苧麻



苧麻 附種苧麻法、王禎麻苧圖譜、苧略、

苧麻、別錄下品、陸璣詩疏、紵亦麻也、農政全書謂、紵從絲、非苧、北地寒不宜、考救荒本草、苧根味甘、煮食甜美、許州田園、亦有種者、蓋自淮而北、近時皆致力於棉花、禦寒時久、而禦暑時暫、絺綌之用、唯城市爲殷、故種蒔者少耳、野苧極繁、芟除爲難、不任績、山苧稍勁、花作長穗、翹出稍異、

雋叟農曰、徐元扈謂、北方無苧、詩可以漚紵、紵爲絲、此誤也、苧麻屬、故言漚、絲不可漚、菅麻苧皆草、絲則非其類、江南、安慶、寧國、池州、山地多有苧、要以江西湖南、及閩粵爲盛、江西之撫州、建昌、寧都、廣信、贛州、南安、袁州、苧最饒、緝繡織線、猶嘉湖之治絲、宜黃之機上白、市者驚其名、然非佳品、寧都州俗、無不緝麻之家、敏者、一日可績三四兩、鈍者亦兩以上、請織匠織成布、一機長者十餘丈、短者亦十丈以上、四五兩、織成一丈布者、爲最細、次六七兩、次八九兩、則粗矣、夏布墟、則安福鄉之會同集、仁義鄉之固厚集、懷德鄉之璜溪集、在城、則軍山集、

每月集期、土人商賈、雜遝如雲、計城鄉所產、歲鬻數十萬緡、女紅之利普矣、石城縣志亦曰、石邑夏布、歲出數十萬疋外、貿吳越毫間、贛州各邑、皆業苧、閩賈於二月時放苧錢、夏秋收苧、歸而造布、然不如寧都布、潔白細密、苧以瘦韌潔白爲上、其黃者曰糙麻、婦功間日、緝濯柔細、經時累月、織成一衣、曰女兒布、苧之精者、無逾此、居人服之、商賈不可得也、湖南則瀏陽、湘鄉、攸縣、茶陵、醴陵、皆麻鄉、往時巴陵、道州、武陵、郴州、皆貢練紵、今則並瀏陽上供、亦裁肥地、苧深四五尺、剝至三四次、擇避風處蒔之、夏有苧市、捆載以售、溪蠻叢笑云、漢傳載闌干、闌干、獠言紵巾、有績治細白苧麻、以旬月而成、名娘子布、則亦女兒布之類、非僅獠俗也、苗人據矮機、席地而織、設虛場、以麻布易所無也、寰宇記、宜州、有都洛麻、狹幅布、今語曰多羅麻、廣西志、梧州出絡布、以絡麻織成、因名、並苧類也、桂海虞衡志、練子出兩江川崗、大略似苧布、有花紋者、謂之花練、彼人亦自貴重、嶺外代答、邕州左右江溪崗、產苧麻、土人擇其細長者爲練子、暑衣之輕

涼離汗者也、花練一端長四丈、重數十錢、卷入之小竹筒、尙有餘地、以染真紅、尤易著色、厥價不廉、稍細者一匹數十緡也、粵之新會、有細苧、蓋左思所謂、筒中黃潤者、凡疊布必成筭、一筭十端、而葛之大者、率以兩端爲一連、苧則一端爲一連、他布則以六丈爲端、四丈爲疋、此其別也、禹貢曰、島夷卉服、傳曰、島夷南海島上夷也、卉草也、卉服、葛越也、葛越、南方之布、以葛爲之、以其產於越、故曰葛越也、左思曰、蕉葛升越、弱於羅紈、正義曰、卉服、葛越蕉竹之屬、越即苧麻也、漢徐氏女、贈其夫以越布、鄧后、賜諸貴人白越、是也、漢書云、粵地多果布之湊、韋昭曰、布、葛布也、顏師古曰、布、謂諸雜細布、皆是也、其黃潤者、生苧也、細者爲綌、粗者爲苧、苧一作紵、禹貢曰、厥匪織貝、傳曰、織細紵也、疏曰、細紵布也、其曰花練、曰穀纈、曰細都、曰弱析、皆其類、志稱、蠻布、織蕉竹苧麻都落等麻、有青黃白絳火五種、黃白曰苧、亦曰白絳、青絳曰麻、火曰火麻、都落即絳也、馬援在交趾、嘗衣都布單衣、都布者、絳布也、絳者、言麻之可經、可絳者也、其細者、當暑

服之涼爽無油汗氣練之柔熟如椿椒繭綢可以禦冬新興縣最盛估人率以綿布易之其女紅治絡麻者十之九治苧者十之三治蕉十之一紡蠶作繭者千之一而已又有魚凍布莞中女子以絲兼紵爲之柔滑而白若魚凍謂紗羅多浣則黃此布愈浣則愈白云

〔長編〕苧根詩經可以漚紵陸璣疏云紵亦麻也科生數十莖宿根在地中至春自生不歲種也荆楊之間一歲三收今官園種之歲再割便生剝之以鍊若竹刮其表厚皮自脫但得其裏如筋者煮之用緝謂之微苧今南越紵布皆用此麻

別錄苧根寒主小兒赤丹其漬苧汁療渴陶隱居云即今績苧爾又有山苧亦相似可入用也

唐本草注別錄云根安胎帖熱丹毒腫有大效漚苧汁主消渴也

本草拾遺苧破血漬苧與產婦溫服之將苧麻與產婦枕之止血暈產後腹痛

以苧安腹上、則止、蠶咬人、毒入肉、取苧汁飲之、今以苧近蠶、不生也、
日華子云、味甘、滑冷無毒、治心膈熱、漏胎下血、產前後心煩悶、天行熱疾、大渴
大狂、服金石藥、人心熱、暑毒箭、蛇蟲咬、

圖經、苧根、舊不載、所出州土、今閩、蜀、浙江多有之、其皮可以績布、苗高七八尺、
葉如楮葉、面青背白、有短毛、夏秋間、著細穗青花、其根黃白而輕虛、二月八月
採、又有一種山苧、亦相似、孕婦胎損方所須、又主白丹、濃煮水浴之、日三四差、
韋宙療癰疽發背、初覺未成膿者、以苧根葉熟搗傅上、日夜數易之、腫消則差
矣、

本草衍義、苧根、如葶麻、花如白楊而長成、穗生、每一朵、凡數十穗、青白色、
聖惠方、治妊娠胎動欲墮、腹痛不可忍者、用苧根二兩、剉、銀五兩、酒一盞、水一
大盞、同煎去滓、不計時候、分溫作二服、

肘後方、丹者惡毒之瘡、五色無常、苧根三升、水三斗、煮浴、每日塗之、

斗門方治五種淋、用苧麻根兩莖打碎、以水一盃半、煎取半盃、頓服卽通、大妙、
梅師方治諸癰疽發背、或發乳房、初起微赤、不急治之、卽死、速消方、搗苧根傅
之、數易、

救荒本草、苧根、舊云、閩、蜀、江浙多有之、今許州人家田園中、亦有種者、苗高七
八尺、一科十數莖、葉如楮葉、而不花、父、面青背白、上有短毛、又似蘇子葉、其葉
間出細穗、花如白楊而長、每一朵凡十數穗、花青白色、子熟茶褐色、其根黃白
色、如手指、叢宿根地中、至春自生、不須藏種、根味甘、採根刮洗去皮、煮極熟食
之、甜美、
本草綱目、李時珍曰、苧家苧也、又有山苧、野苧也、有紫苧、葉面紫、白苧、葉面青、
其背皆白、可刮洗煮食救荒、味甘美、其子茶褐色、九月收之、二月可種、宿根亦
自生、

〔種苧麻法〕農桑輯要、種苧麻法、三四月種子者、初用沙薄地爲上、兩和地爲

次、園圃內種之、如無園、源河近井處亦得、先倒翻土一二遍、然後作畦、闊半步、長四步、再翻一遍、用腳浮躡、或杵背浮按稍實、不然著水虛懸、再耙平、隔宿用水飲畦、明旦、細齒耙浮耬起土、再耙平、隨時用濕潤畦土半升、子粒一合相和勻撒、子一合可種六七畦、撒畢、不用覆土、覆土則不出、於畦內、用極細梢杖三四根、撥刺令平、可畦搭二三尺高棚、上用細箔遮蓋、五六月內炎熱時、箔上加苫重蓋、爲要陰密不致曬死、但地皮稍乾、用炊帚細灑水於棚上、常令其下濕潤、或子未生芽苗、或出力弱不禁、注水陡澆故也、如遇天陰及早夜、撒去覆蓋、至十日後、苗出、有草卽拔、苗高三指、不須用棚、如地稍乾、用微水輕澆、約長二寸、卻擇比前稍壯地、別作畦移栽、臨移時、隔宿先將有苗畦澆過、明旦亦將做下空畦澆過、將苧麻苗、用刀器帶土掘出、轉移在內、相離四寸一栽、務要頻鋤、三五日一澆、如此將護二十日之後、十日半月一澆、至十月後、用牛驢馬生糞蓋厚一尺、預選秋耕擺熟肥地、更用細糞糞過、來年春首移栽、

地氣已動爲上時、芽動爲中時、苗長爲下時、栽法、掘區成行、方圍相去一尺五寸、將畦中科苗移出、栽於區內、擁土、區中以水漚之、若夏秋移栽、須趁雨水地濕、分根連土、於側近地內分栽、亦可移栽年深宿根者、移時、用刀斧將根截斷、長可三四指、栽時成行作區、方圍各離一尺五寸、每區臥栽三二根、棋盤相對、擁土畢、然後下水、候三五日復澆、苗高勤鋤、旱則澆之、若地遠移栽者、須根科少帶原土、蒲包封裹外、復用席包掩合、勿透風日、雖數百里外、栽之亦活、栽培法如前、初年長約一尺、便割一鎌、麻未堪用、再候長成所割、即堪續用、至十月、即將割過根、積用牛馬糞蓋厚一尺、不至凍死、元扈先生曰、如此蓋厚、則栽得過冬、所以中土得種、若北方未知可、至二月初、把去糞、令苗出、以否、吾鄉三十度上下地方、蓋厚一二寸、即得矣、壓條滋蔭、如桑、後歲歲如此、法移栽亦可、第三年、根科交蔭稠密、不移必漸不旺、即將本科周圍稠密新科、再依前法分栽、每歲可割三鎌、每割時、須根傍小芽出土、約高五分、其大麻、即爲可割、大麻旣割、其小芽榮長、便是下次再割麻也、若

小芽過高、大麻不割、不惟小芽不旺、又損已成之麻、大約五月初一鎌、六月半一鎌、八月半一鎌、唯中間一鎌長疾麻、亦最好、刈倒時、隨即用竹刀、或鐵刀、從梢分批開、用手剝下皮、即以刀刮其白瓢、其浮上皺皮自去、縛作小葉、搭於房上、夜露晝曝、如此五七日、其麻自然潔白、然後收之、若值陰雨、即於屋底風道內搭涼、去聲恐經雨黑漬故也、所剝之麻、春夏秋渴暖時分績、與常

法同、若於冬月、用溫水潤濕、易爲分擘也、如乾硬難分、其績既成、纏作纓子、於水瓮內浸一宿、紡車紡訖、用桑柴灰淋、下水內浸一宿、撈出、每纊五兩、可用淨水一盞、細石灰拌勻、置於器物內、停放一宿、至來日、澤去石灰、卻用黍楷灰淋水煮過、自然白軟、曬乾、再用清水煮一度、別用水擺拔、極淨、曬乾、逗成纏鋪、經蔭織造、與常法同、此麻一歲三割、每畝得麻三十斤、少不下二十斤、目今陳蔡間、每斤價錢三百文、已過常麻數倍、善績者、麻皮一斤、得績一斤細者、有一斤織布一疋、次斤半一疋、又次二斤三斤一疋、其布柔靱潔白、

比之常布、又價高一二倍、然則此麻但栽植有成、便自宿根、可謂暫勞永逸矣、

〔王禎麻苧圖譜〕圖譜叙曰、麻苧之有用具、南北不無異同、民俗豈能通變、如南人不解刈麻、北人不解治苧、及有漚浸審生熟之節、車紡分大小之工、凡絺綌縹紵、皆其所出、今併所附類、一一條列、庶使南北互相爲法云、
元扈先生曰、苧性畏寒、不宜北土、北方地氣所絕、無如之何、然紵衣漚紵、卽又北方自古有之、宜試種爲得、

刈刀

刈刀、穫麻亦也、或作兩刃、但用鎌柄旋插其刃、俯身控刈、取其平穩便易、北方種麻頗多、或至連頃、另有刀工、各具其器、割刈根莖、剗削梢葉、甚有速效、